



## NOVOSTI

## TAMO GDJE POČINJU PRIJATELJSTVA

U subotu, 11.03.2017. godine u prostorijama Fondacije Hastor održan je još jedan mjesečni sastanak studenata-stipendista Fondacije Hastor. Sarajevo, Goražde, Novi Travnik, Livno, Foča, Jajce... svi na jednom mjestu, jer im je spona Fondacija Hastor. Kao i svaki put, naši stipendisti su imali priliku zabaviti se, a pri tome se i upoznati međusobno.

Ovaj sastanak je protekao mnogo opuštenije nego prijašnji sastanci. Stipendisti su po dolasku podijeljeni u grupe, s tim da se pazilo da se ljudi u grupama ne poznaju. Zadatak svakog stipendiste je bio da obavi intervju sa osobom pored sebe i podatke o toj osobi zapisane na papir stavi u kutiju. Na tom papiru su bili podaci o školovanju, osnovne karakteristike te osobe, neobične lične situacije i anegdote.

Nakon što su obavljani svi intervjui, izvlačili su se papiri i čitale karakteristike nekog od stipendista dok su drugi imali zadatak da prepoznaju o kome se radi. Saznali smo ko se plaši balona, ko voli pileću maslenicu, ko je na prvi sastanak izveo djevojku u park, ko je propao kroz led u potoku, ko sluša metal, koja djevojka voli igrati stoni fudbal...

Koliko je bitan timski rad i da stipendisti zajedno jačaju oslanjajući se jedni na druge pokazala je i iduća

igra, gdje su stipendisti imali priliku pokazati opće znanje, a i znanje o Fondaciji Hastor. Svaka grupa je imala po jedan papir u boji koji bi dizali svaki put kada bi se javili da daju odgovor na pitanje. Ova igra je pokazala kako funkcionišu stipendisti kao timski igrači te koliko su upućeni i koliko im je znanje iz drugih oblasti, pored onoga za šta se školuju.

Ove igre ne samo da su prisutne nasmijala do suza, već su uspjele i napraviti konekciju između stipendista te započeti nova prijateljstva. Fondacija Hastor je još jednom pokazala svoju moć spajanja ljudi sličnih ideja, priča, zanimanja, a opet toliko drugačijih da se privlače međusobno i da u njihovom društvu nikad nije dosadno.

Sadžida Kosovac

## EŠEF KOVAČEVIĆ



„Žudi za sudbinom ovo lice, želi upoznati nove raskrsnice, hoće da vidi životne ubice, želi da ih pogleda ravno u lice...“, stihovi su iz nedavno objavljene knjige “Talasi duše” našeg stipendiste Ešefa Kovačevića. Ešef je učenik trećeg razreda Ekonomske škole Srebrenik. Živi u blizini Gradačca u mjestu Srnice Donje. Prepoznatljiv je po svome posebnom načinu pisanja i interesovanju ka glumi, crtanju te imitacijama. “Talasi duše” je zbirka poezije mladih autora u kojima i Ešefovi tekstovi zauzimaju veliki dio. Sklonost ka pisanju ima još od osnovne škole. Puno puta svoje književne sposobnosti iskušavao je na različitim takmičenjima, ali želja za većim uspjesima javila se početkom srednje škole. Najviše voli da piše pjesme, kako ljubavne i opisne, tako i rodoljubive. Ističe

i nekoliko napisanih drama komedije koje je zajedno sa prijateljima čak imao priliku i glumiti u školi. Trenutno priprema sljedeću zbirku pjesama, ovaj put samostalnu. Želja mu je da nekad u budućnosti napiše roman ljubavnog karaktera. Kao osoba koja voli da ima popunjeno svo slobodno vrijeme, već tri godine član je Asocijacije srednjoškolaca u BiH. Ističe kako voli druženja, smijeh, igre i sve što ima dovoljno znanja i nauke. Stipendista je Fondacije Hastor je od sedmog razreda osnovne škole. “Fondacija me uglavnom podržava u svim mojim aktivnostima, a novac koji dobijem kao stipendiju ulažem u sebe u smislu znanja, jer je to za mene najbolja investicija.”, poručuje Ešef.

Hanka Mujkić



## THE WORLD SCHOLAR'S CUP:

### STIPENDISTICE FONDACIJE HASTOR UČESNICE POZNATOG SVJETSKOG TAKMIČENJA ZA UČENIKE SREDNJIH ŠKOLA

U februaru 2017. godine, u Sarajevu je održan „The World Scholar’s Cup“, poznato svjetsko takmičenje za učenike srednje škole. Po prvi put se ovo takmičenje održava u našoj zemlji, pa nam je samim tim bila i velika čast što su učešće uzele i naše stipendistice, Anisa Karić, Dina Karić i Amina Višća.



Ideja ovog takmičenja je da bude drugačije od tradicionalnih akademskih takmičenja i konferencija te da da šansu učenicima da pokažu svoje jače strane, ali i da razviju nove. Danas na „The World Scholar’s Cup“ učestvuju učenici iz preko 50 zemalja svijeta. Ove godine, na 10. godišnjicu od osnivanja, takmičenje se održalo i u Sarajevu, u „Internacionalnoj srednjoj školi“, Sarajevo gdje je učestvovalo preko 300 takmičara.

Naše stipendistice su činile jedan tim i zajedno su osvojile preko 20 medalja, od čega 3 zlatne, čime su ostvarile plasman u finale (tzv. „Global Round“) koje će se ove godine održati u Atini, Hanoiju i Cape Townu. Prvi dan takmičenja bio je rezervisan za ceremoniju otvaranja koja je učenicima bila jako zanimljiva, plesali su, pjevali, voditelji su bili jako zanimljivi, nakon čega su održane glavne kategorije takmičenja:

„Pisanje eseja“ i „Debata“ na različite teme. Drugi dan je održan kviz znanja i „Talent show“.

Našim stipendisticama su debate bile najzanimljivije, budući da su se timovi mogli pripremati prije samog debatovanja. „Najzanimljivija tema za debatu bila mi je „Da li bi BiH trebala poslati ženu na Mjesec?“. Mi smo bile afirmacijski tim i glavni argumenti su nam bili da bi to bilo jako dobro za našu zemlju, bili bismo poznati u svijetu, dolazilo bi puno novca u našu državu i slično.“, kazala nam je Dina.

Sve tri su nam istakle da im je ovo takmičenje bilo jako zanimljivo i da je to bilo lijepo iskustvo za njih, a najviše se raduju „Global Roundu“ koji se održava u Atini od 18. do 23. jula 2017. godine.

Amra Imamović



Fondacija Hastor je po Konkursu za stipendiranje studenata od januara tekuće godine bogatija za dvadeset jednog stipendistu. Čast nam je da ovaj i sljedeći broj našeg newslettera posvetimo predstavljanju upravo njih, naših novih studenata -stipendista.

„Fondacija Hastor je postala velika prekretnica u mom životu. Pored volontiranja i komuniciranja s drugima, Fondacija Hastor mi pruža pomoć pri usavršavanju i napredovanju u oblasti ekonomije. Jako sam odgovorna, motivirana i komunikativna osoba. Želim podići svoj nivo u ovoj oblasti, a priliku za to mi je upravo dala Fondacija.“



**AJDA KESEDŽIĆ**  
Ekonomski fakultet Bihać, II godina



**AZRA MAHINIĆ**  
Građevinski fakultet Mostar, IV godina

„Podrška Fondacije Hastor mi daje volju i snagu za dalje uspjehe. Predstavlja mi oslonac u svakom smislu te riječi, kao finansijska podrška, kao stalni motivatori ka tome da unaprijedim svoju sredinu u vidu volontiranja i da uvijek dajem svoj maksimum jer se znanje uvijek isplati.“

„Biti dio ove porodice meni predstavlja ogroman motiv za uspjeh. Fondacija Hastor pruža bezrezervnu podršku svim svojim stipendistima, pa tako i meni. Jako sam zahvalan što sam baš ja imao sreće da budem dijelom ove velike filantropske priče. Fondacija nas uči poštenju, hrabrosti, toleranciji i radu, te nam daje priliku da budemo koristan član društva.“



**ZINAID KAPIĆ**  
Tehnički fakultet Bihać, II godina

**TARIK MURATSPAHIĆ**

Pravni fakultet Sarajevo, III godina

„Koliko god bili dobar student ili koliko god voljeli ono čime se bavite, gotovo uvijek se susrećemo sa periodima kriza različitih inteziteta. Mi studenti jako često razmišljamo o ispravnosti odluke odabira profesije i životnog puta. Onog dana kada sam postao član Fondacije, sve ove misli i dileme su izbljebile. Naime, volontiranje na terenu i razgovori sa ljudima, uposlenicima i svim osobljem Fondacije Hastor mora ojačati ličnost i stav. Jednostavno znate da imate ogromnu podršku sa kojom put u nazad ne postoji.“

„Iako sam stipendista relativno kratak period, od prvog dana sam se osjetila članom ove velike porodice. Fondacija Hastor to zaista jeste, porodica koja nesebično pruža pažnju i oslonac za sve nas, te nas zajedno motiviše da postanemo prije svega dobri ljudi, da ne zanemarujemo svoje snove i da imamo dovoljno samopouzdanja da iste i ostvarimo. Divan je osjećaj kad znaš da nisi sam i da imaš mnoštvo novih prijatelja iz cijele BiH na koje možeš računati. Hvala vam!“


**NIRVANA ŽIŠKO**

Akademija likovnih umjetnosti Sarajevo, II godina

**AHMED KARIĆ**

Elektrotehnički fakultet Sarajevo, I godina (Master studij)


“Stipendiju Fondacije Hastor vidim kao vjetar u leđa u predstojećem studijskom periodu. Stipendija u velikoj mjeri olakšava nošenje sa svakodnevnim studentskim finansijskim potrebama, posebno ukoliko vam je mjesto studiranja daleko od porodice. Sa druge strane kroz aktivnosti u Fondaciji Hastor u katkom periodu stupili smo u kontakt i stekli prijateljstva sa studentima iz svih krajeva Bosne i Hercegovine, što je izvrsna stvar i što velikim dijelom predstavlja onaj drugi nematerijalni vid podrške.”



**AJLA TABAK**  
Ekonomski fakultet Zenica, II godina

„Stipendija Fondacije „Hastor“ mi prije svega znači veliku finansijsku pomoć, omogućila mi je da se finansijski osamostalim i na taj način sazrijem, a naravno donijela je i brojne druge pogodnosti kao što su razna poznanstva i druženja. Nakon svakog sastanka u Sarajevu, dođem kući više motivisana, sa većom željom za radom. S tom motivacijom nastojim i kroz volonterski angažman da priuštim stipendistima svo znanje koje posjedujem. Učeći mlade stipendiste o vrijednostima volontiranja i davanja, povećavam mogućnost da oni kao odrasle osobe nastave aktivno sudjelovati u životu svoje zajednice. Također, nastojim ih naučiti odgovornosti i povećati samopoštovanje koje je iznimno važno za svakog pojedinca.“

„Čast mi je biti dio Fondacije Hastor. Pored finansijske podrške, nova iskustva i novi ljudi koji ulaze u moj život su dragocjeni. Poznanstva koja stičem u Fondaciji Hastor iz dana u dan prelaze u čvrsta prijateljstva. Zato sam neizmjerljivo zahvalna na prilici da budem dio Fondacije Hastor.“



**IRENA KARAMEHMEDOVIĆ**  
Muzička akademija Sarajevo, III godina

„Podrška Fondacije Hastor mi znači jako mnogo. Pomaže mi da ovu našu tešku svakodnevnicu sa svojim roditeljima lakše preživim. Također otvara mi nove puteve i nove vidike, te kroz volonterski rad svaki mjesec zajedno sa Fondacijom Hastor mijenjam svoju državu Bosnu i Hercegovinu i svoj svijet. Kroz podršku mladima, Fondacija Hastor svakodnevno unaprijeđuje i podstiče mlade ljude i djecu na borbu protiv surove svakodnevnice, trud i zalaganje, te im pruža nadu u bolje sutra.“



**AMAR HALILOVIĆ**  
Elektrotehnički fakultet Sarajevo, II godina




U ovom broju donosimo jednostavan prijedlog za ukrašavanje tegli uz pomoć predmeta koje možete naći u svakom domaćinstvu, a sam postupak garantuje pravu zabavu, dok je krajnji proizvod ishod vaše mašte i kreativnosti. Prijedlog nam šalje naša stipendistica Muharema Šabanović.

Za pravljenje ovih teglica potrebno vam je: školske krede u različitim bojama, kuhinjska so, teglice različitih oblika i veličina.

### Postupak izrade:


Usitnite školske krede. Što više boja budete imali, teglice će biti šarenije i ljepše.

Usitnjene krede pomiješajte sa kuhinjskom soli. So će odmah biti u boji krede.


**1.**

**2.**


Nakon što ste dobili so u različitim bojama, punite teglice tako da dobijete različite uzorke unutar teglice – možete puniti vodoravno, koso, na različite načine, koristeći različite boje.

Krajnji rezultat je ukrasna teglica koju možete staviti na radni sto, ali i pokloniti dragoj osobi uz prigodnu poruku.


**3.**

Administrativni tim mi poslao najave za 25. i 26. februar. 189 studenata iz 35 mjesta najavilo je svoje volontiranje. Odlučih se da posjetim studente iz Gradačca i Brčkog kojih je 18 i družiti će se sa 27 osnovaca i 42 srednjoškolca, te bih se tako susreo i porazgovarao sa 87 stipendista Fondacije Hastor. U 6:30 sati, 25. februara, skidam sa auta nekoliko centimetara debeo sloj snijega koji je u toku noći napadao. Dok palim auto razmišljam da mi može praviti probleme cesta preko Nišičke visoravni, a kroz Karaulu je tunel pa mislim da ću moći stići na vrijeme u Brku gdje su Jasmina i Irma od 10 sati zakazale volontiranje. Do Gajeva stigoh bez problema uz veliki oprez jer je po cesti bilo utabanog snijega iako su grtalice radile. Na raskrsnici za Musiće upali se crvena lampa u autu i ogłosi se opominjući zvuk da nešto nije uredu. Zaustavim i ugasm auto. Subota je, 7 sati. Šta uraditi?

Ponovo upalim, sve se ponovi - i zvučni i svjetlosni signal. Kako je u pitanju crvena lampica, ne smijem voziti. Ubacim mjenjač u neutralan položaj i na leri spustim auto do motela „Panorama“, iznad Olova. Tu uz čaj i kahvu sačekah 8 sati, pa nazovem Fočo Asima koji organizova dolazak službe „Pomoć na putu“. Već u 10 sati sam mogao nastaviti vožnju. Odlučih se da vozim za Gradačac gdje su Mulaosmanović Amila i Ibreljić Almin zakazali sastanak od 9 do 14 sati u prostorijama KULT-a sa 7 osnovaca i 10 srednjoškolca. Zatekoh ih u vrlo radnoj atmosferi.

Almin se potrudio da na laptopu pripremi materijal na temu „Elektronsko učenje“. Dio časa na kojem bijah prisutan baš mi se dopade. Dok malo porazgovarah sa prisutnima stiže i 14 sati - vrijeme da idu kući, a i par roditelja stiže pred prostorije KULT-a pa odobrih da završi današnje druženje. U Gradačcu se sretoh sa starim poznanikom koji me zamoli da svratim kod njega. „Ja imam dobru šah garnituru, a i spavaću sobu za goste, pa dok mi igramo šaha neka se i žene malo druže, a onda na spavanje, pa sutra novi dan nova nafaka“. Ne mogoh odbiti ovakav prijedlog.

Iz Međeđe kod Gradačca stigoh u Brku brže nego što sam planirao. U 9:45 sati pred Mjesni ured u Brki stiže Jukić Irma. Pitam je što je tako poranila kad je volontiranje od 10 sati.

„Došla sam da malo zagrijem prostorije dok učenici stignu.“

Uskoro stiže i Lejlić Jasmina, zatim Čosović Adelisa i Sulejmanović Fatima. Ubrzo se napuni prostorija učenicima osnovnih i srednjih škola. Tačno u 10 sati Irma otpoče predavanje na temu „Elektronsko učenje“. Takva tačnost se rijetko viđa i kod nastavnika koji rade za platu. Kasnije u razgovoru Fatima reče: „Ja i Adelisa imamo 9 srednjoškolca, dogovorili smo se da poštujemo zakazano vrijeme i početka, završetka kao i pauza, sve je unaprijed određeno.“







U 11 sati ulazim u prostorije Mjesne zajednice u Brki, a tamo sala za sastanke puna stipendista Fondacije Hastor. Studenti Fazlović Alma, Ibrahimović Mahir, Džaić Amila, Hidanović Merima, Junuzović Varisa i Šečić Enisa sa 16 srednjoškolaca obrađuju temu: „Zašto volim Bosnu i Hercegovinu“. Zamolih da malo popričamo, pa kad ja odem neka oni nastave sa obaveznom temom. Studenti se pohvališe da su zadovoljni sa postignutim rezultatima na svojim fakultetima. Merima reče da joj je puno draže kad ovako usklade mogućnosti da se više grupa udruže i provedu zajednički ovih 5 sati, što i ja pohvalih. Šejla Husković, učenica 4. razreda Srednje ekonomske škole reče da je ovo druženje raduje i da jedva čeka da upiše fakultet pa da i ona može drugima pomagati kao što Merima i Amela sad njoj pomažu da postigne bolje rezultate u školi. Pozdravih se i krenuh za Brčko. U Brčkom ispred zgrade Mjesne zajednice Stari grad studenti Almir Arnautović i Dženita Ibrić sa svojih 5 osnovaca, te Asmir Bajraktarević i Jasmina Medinić sa svojih 7 srednjoškolaca iznijeli stolice i razgovaraju o temi: „Učenje putem interneta“. Adis Jahić, učenik 3. razreda Tehničke škole kaže da preko interneta puno više nauči, ali ono što nauči sa nastavnikom puno lakše može da objasni drugima. Još malo porazgovarasm o učenju i volontiranju pa se uputih u Gornji Rahić. Stigoh kratko poslije 14 sati u Gornji Rahić u restoran „Havana“ gdje studentice Kovačević Emina i Sivčević Arnela sa 8 osnovaca obrađuju temu: „Ljudska prava“. Rekoše mi da su uspostavili drugarski odnos kako između sebe tako i između učenika.

„Učenici redovno dolaze na ova druženja i vrlo su aktivni, tako da se mi mentori moramo dobro pripremiti kako bi održali ovaj tempo druženja. Aldijana, Semir i Hajrudin učenici su devetog razreda, pa uvijek imaju pitanja da im pomognemo da steknu više znanja kako bi dobili bolju ocjenu, što mi rado činimo“, reče Emina. Pozdravih se pa krenuh, ostavih ih da dovrše započeto. Vozeći se ka Vogošći zaključujem da su studenti koje sam posjetio juče i danas usvojili ozbiljnost, odgovornost, tačnost kao i druge manire lijepog ponašanja.

U Janji u Domu mladih, 4. marta 2017. godine, od 10 do 15 sati zakazala volontiranje Amra Redžić sa 35 učenika osnovnih i srednjih škola. Odlučih da vidim kako se kao student prve godine snalazi sa ovolikim brojem djece. Krenuh ranije iz Vogošće kako bih oko 10 sati stigao u Janju, put od preko 200 kilometara. Lijep sunčan dan, suha cesta, uslovi povoljni za vožnju omogućuje mi da na vrijeme stignem na odredište. U Domu mladih u Janji Amra mi reče: „Jedan učenik nije došao, javili su mi da je bolestan, a ovdje imam 34 učenika. Sad obrađujemo temu: Mladi i poroci savremenog doba.“ Rekoh joj da oni nastave kao da ja nisam prisutan.

„Za mene su poroci“, veli jedna učenica „sve što beskorisno oduzima vrijeme.“

„Ja radije čitam knjige nego da preko mobitela igram igrice!“, reče jedan dječak.

Učenica Melisa kaže: „Meni majka često govori šta valja, a šta ne.“

Salih reče: „Poroci su droga, alkohol, ali i cigarete.“

„Ma ako govorimo šta ne valja, ne valja ni previše surfati po internetu i zadržavati se previše na facebooku!“, reče Rijad.

Amra čita rečenicu sa laptopa: „Kućni odgoj je vrlo bitan u vaspitanju mlade ličnosti, ali i Fondacija Hastor isto tako pomaže mladim osobama da izbjegnju razne poroke i postanu obrazovane i vaspitane ličnosti voljne da rade, da su tačne, odgovorne...“

Amra pogleda na sat i reče: „Sad je vrijeme za pauzu. Izidite u dvorište, pa ćemo poslije 10 minuta nastaviti!“

Tačno poslije 10 minuta svi su bili na svojim mjestima kao u školi na redovnoj nastavi. Kratko porazgovarasm o učenju i volontiranju, pa ih ostavih da se i dalje druže, a ja se uputih sa Fadilom dalje.

Zahvaljujući posvećenosti i izuzetnom doprinosu radu administracije Fondacije Hastor, ovomjesečnu titulu stipendiste mjeseca ponijela je **Sibela Fetinci**, studentica Fakulteta zdravstvenih studija u Sarajevu.




Sibela je studentica iz Novog Travnika. Završila je srednju školu u kojoj je dobila naobrazbu farmaceutskog tehničara. Na pitanje o njenom studiju i zanimanju kaže: „Od malih nogu sam se željela baviti medicinom pa sam nakon završene srednje škole upisala Fakultet zdravstvenih studija u Sarajevu, smjer Radiološke tehnologije. Sada sam treća godina na tom fakultetu i što više upoznajem tu nauku i dobijam priliku za rad, sigurnija sam u svoj odabir. To je baš ono čime se želim baviti cijeli život. Želim pomagati drugima i biti okružena ljudima koji to isto rade.“

Slobodno vrijeme Sibela voli provesti u prirodi, osobito ako to uključuje duge šetnje ili sportske aktivnosti sa prijateljima, a ukoliko nije u prilici za to, onda rado pročita knjigu ili pogleda film.

Sibela je stipendista Fondacije Hastor još od sedmog razreda osnovne škole. „Pošto sam podršku od

Fondacije dobijala kroz skoro cijelo svoje školovanje, bilo bi mi nezamislivo da nisam njen dio. Smatram da bi mi školovanje bilo nepotpuno, jer pored svega što sam naučila u školi usporedo sam učila i od Fondacije, prije svega odgovornosti i timskom radu. Zahvalna sam im što sam sada odgovorna i vrijedna osoba i što to znanje mogu koristiti i na fakultetu. Kada nekome pričam o Fondaciji Hastor prvo što mi padne na pamet jesu naši zajednički sastanci i kažem da Fondacija spaja ljude, ljude iz cijele BiH i da sam zahvaljujući tome upoznala nove prijatelje. Čast mi je biti dio Fondacije Hastor i biti okružena uspješnim, pametnim i perspektivnim ljudima“, dodaje naša stipendistica mjeseca. Sibeli ovom prilikom želimo sreću i uspjeh u njenom daljem radu i školovanju.

Mirza Okić



Džulisa Otuzbir  
Fakultet političkih  
nauka, Sarajevo



## BOSNA U PROLJEĆE

Kad razbude se šumarci u Bosni,  
i kad prva lasta zapjeva na grani,  
probude se i pašnjaci rosni,  
nema snijega i zime, već samo mraz rani.

Kad sunce proljetno pruži svoje zrake  
u svaki dio Bosne, i svaki njen kut,  
ono oživi uspavane šumarke,  
oživi svaki zastarjeli put.


A rijeke postanu ogledalo svakog kamena,  
dok sunce miluje svaku kap,  
a onda pospe tu malo svog plamena,  
i razbistri svako ušće i svaki slap.

I protegne se i most u Mostaru,  
zažubori Vrelo Bosne ispod Igmana,  
nikome ne dam Bosnu, našu majku staru,  
jer ona je srce cijeloga Balkana.

Uzdigne se uvis planina svaka,  
polja se rastegnu u šume.  
U Bosni je lijepa slika svaka,  
mogli bi nizati mnoge albume.

Sevdalinka u sokaku začuje se pred akšam,  
to je pjesma bosanskih momaka.  
Ovo je pjesma Bosni, da joj srce olakšam,  
njome je očarana duša baš svaka.

Ešef Kovačević



Edna Đuliman, Druga OŠ Bugojno

Naš rad su podržala i dva nova prijatelja  
Fondacije Hastor: MAX MEDIA d.o.o. i  
EXCLUSIVE d.o.o.  
Ovom prilikom im se zahvaljujemo.



*Exclusive*  
web shop za uredski program

## FONDACIJA HASTOR

Bulevar Meše Selimovića 16, Sarajevo  
033 774 789  
033 774 823  
fondacija@hastor.ba

## REDAKCIJA

Džulisa Otuzbir  
Sadžida Kosovac  
Hanka Mujkić  
Mirza Okić

Emina Adilović  
Lejla Đonlagić  
Amra Imamović  
Nirvana Žiško